
ԿՈՍՏԱՆԴՆՈՒՊՈԼՍԻ ՀՈՒՅՆ ՀԱՄԱՑՆՔԸ XV- XVII ԴԱՐԵՐՈՒՄ

ԲՐՈՒՏՅԱՆ Մ. Ա.

Բյուզանդական կայսրությունն իր վախճանին հասավ 1453 թ., երբ թուրքերը գրավեցին նրա մայրաքաղաք Կոստանդնուպոլիսը: Չնայած հերոսական պաշտպանությանը՝ քաղաքն ընկավ, որին հաջորդեցին թալանն ու կողոպուտը: Այդ պաշտպանության մասին խոսել են շատ պատմիչներ, նույնիսկ իր թուրքամետությամբ աչքի ընկնող Կրիստովոլոսը: Ազգությամբ հույն լինելով հանդերձ՝ նա իր աշխատության կիզակետում է դնում սուլթան Մեհմեդ II-ին՝ փառաբանելով նրա գործունեությունը: Կրիստովոլոսը, որը դեպքերի ականատեսն է, այսպես է խոսում հույների մասին. «Հույները ապշած էին թշնամու հարձակման ուժգնությունից, բայց նրանք փոխարենը ամեն ինչ արեցին՝ ոչ մի բան հաշվի չառնելով»¹: Իրադարձությունների մեկ այլ ականատես՝ ազգությամբ հույն Մ. Դուկասը, ի սրտե ողբում է հույների համար՝ նշելով հետևյալը. «Տարբեր լեզուներով խոսում են եղելության մասին, ցավում Կոստանդնուպոլսից Սիրիա ընկած տարածքներում, Եգիպտոսում, Հայաստանում և այլուր»²:

Ժամանակի շատ գործիչներ կարծում էին, որ Կոստանդնուպոլսի անկումով վերջ կտրվի քրիստոնյաների բնակեցմանն այնտեղ, քանի որ քաղաքը պիտի դառնար Օսմանյան կայսրության վարչական կենտրոնը: Հետագայում պարզվեց, որ հույները չափազանց հարկավոր էին Մեհմեդին: Նա հետաքրքրվում էր հունական արվեստով: «Նա ուսումնասիրել էր հույներին վերաբերող ամեն ինչ, որ թարգմանված է եղել արաբերեն ու պարսկերեն»³, - գրում է նվաճողով հիացած Կրիստովոլոսը: Հույն ժողովրդի դարավոր մշակույթին ծանոթ Մեհմեդը քաղաքը գրավելուց հետո սկսեց այն վերաբնակեցնել հույներով, հայերով և հրեաներով: Մի քանի տարվա ընթացքում այստեղ բերվեցին հույներ Տրապիզոնից, Ջմյուռնիայից, Սիրիայից⁴, Սամոթրակեից, Թասոսից և տարբեր հունաբնակ վայրերից⁵: Շուտով Կոստանդնուպոլիսը նրանց համար դարձավ համայնքի կենտրոն, ուր այնուհետև պիտի բնակվեին այլ կարգավիճակով:

Վերաբնակեցված հույները տեղավորվեցին մայրաքաղաքի առանձին թաղամասերում, որոնցից շատերը ստացան նրանց նախկին բնակավայրերի անունները: Ըստ Էվլիա Չելեբու՝ Իզմիրի ժողովուրդը բնակվում էր Բյոյուք Ղալաթիայում, կարամանցիները՝ Բյոյուք և Քյուչուկ Կարամանում, գալիպոլցիները՝ Թերասանում: 1475 թ. Կաֆայի գրավումից հետո այնտեղի բնակիչների մի մասը

¹ Kritovoulos, *History of Mehmed the Conqueror*, Princeton, 1954, p. 38.

² Ducas M., *Historia Byzantina*, Bonnae, 1834, p. 306.

³ Kritovoulos, նշվ. աշխ., էջ 23:

⁴ Ducas M., նշվ. աշխ., էջ 314: Հեղինակը նաև նշում է, որ սուլթանի հրամանով մինչև սեպտեմբեր 5000 ընտանիք պիտի տեղափոխվեին մայրաքաղաք (նույն տեղում, էջ 313):

⁵ Kritovoulos, նշվ. աշխ., էջ 103:

հաստատվեց Էդիբնե գափուի և Պալաթի միջև (թաղամասը հետագայում կոչվեց Քեֆեի մահալլեսի), մյուս մասը՝ Կետիք փաշա թաղամասում⁶։ Այս թաղամասերում ապրում էին թե՛ հույներ, թե՛ հայեր և թե՛ հրեաներ։ Մեծ քանակությամբ հույներ տեղավորվել էին Ղալաթիայում և Ֆեներում, որտեղ էլ գտնվում էր նրանց պատրիարքանիստ եկեղեցին։

Հույների թվաքանակը Կոստանդնուպոլսում հետզհետե ստվարանում էր։ XV դ. նրանք թվաքանակով մահմեդականներից հետո առաջինն էին, ունեին իրենց թաղային եկեղեցիները, հիմնական զբաղմունքը և շատ կարևոր տարր էին կայսրության բազմազգ խճանկարում։

Դժվար է ասել XV-XVII դդ. Կոստանդնուպոլսում բնակվող հույների ստույգ թվաքանակը։ Համաձայն իսպանացի ճանապարհորդ դե Վիլյարոյի՝ XVI դ. քաղաքում ապրում էին 60 հազար թուրք, 40 հազար հույն և հայ, 10 հազար հրեա։ Ըստ նրա՝ 4 հազար հույն և լատին ընտանիքներ բնակվում էին Բերայում, 10 հազար հույն ընտանիքներ՝ քաղաքի ծայրամասերում⁷։ Հնարավոր չէ պարզել այս տվյալների բացարձակ ճշտությունը, քանի որ պարբերաբար իրականացվող գաղթեցումները, բնակչության հարկամատյաններից խուսափելը, հաճախակի հրդեհները դժվարացնում են բնակչության խիստ ճշգրիտ թվաքանակը որոշելը։

1453 թվականը եղավ Կոստանդնուպոլսի հունական համայնքի կազմավորման սկզբնակետը։ Այդուհանդերձ, տիրող մահմեդականի ենթակայության տակ էին բնակվելու հույները՝ իբրև կայսրության հպատակ տարրեր, սակայն սկզբնապես օժտված որոշակի արտոնություններով։ Դրանցից էր, օրինակ, այն, որ Մեհմեդը ճանաչեց հունական միլեթը և կայսրության հույն ազգի հոգևոր առաջնորդ նշանակեց Գենադիոս Սքուրիոսին, որն իր ժամանակի լուսավոր քաղաքական գործիչներից էր, ամբողջ կյանքում պայքարել է հույն ազգի բարօրության համար և ստացել «սուրբ» հորջորջումը⁸։

Սքուրիոսը հայտնի էր դեռևս Կ. Պոլսի անկման վերջին տարիներին, երբ Բյուզանդիայի վերնախավը գաղափարապես բաժանվել էր մի քանի հոսանքների՝ լատինամետ, որոնք ցանկանում էին ընդունել Հռոմի պապի գերիշխանությունը՝ Բյուզանդիայի փրկությունը կապելով Եվրոպայի հետ, ուղղափառներ, որոնք ավելի արմատական էին, թուրքամետներ, որոնք բնական էին համարում Բյուզանդական կայսրության կործանումը⁹։ Սքուրիոսն ուղղափառ հոսանքի տիպիկ ներկայացուցիչ էր, իսկ հետագայում նա նույնիսկ ղեկավարել է այդ հոսանքը։ Ուղղա-

⁶ Ապաճյան Գ., Ո՛ր և ինչպե՞ս գետեղվեցան գրավումեն վերջ Իսթանպուլ բերված հայ գաղթականները (Շողակաթ, 1953, N 9-10, էջ 258)։

⁷ Ապաճյան Գ., Հայերու անվամբ կազմված առաջին թաղեր և Իսթանպուլահայ բնակչությունը գրավման հաջորդող տարիներուն մեջ (Շողակաթ, 1954, N 4, էջ 92)։

⁸ Μεγαλη Ελληνικη Εγκυκλοπαίδεια Τόμος 8, σ. 198.

⁹ Ահա թե ինչ է գրել Կրիտովուլոսը. «Մի մեծ պետություն կործանվեց, և այն էլ ամենահինը, ոչ կարճ պայքարից հետո... Ջարմանալի չէ, որ նույն իրադարձություններն են պատահում, և հույները կորցնում են իրենց ղեկավար դերն ու բարեկեցությունը, որոնք անցնում են ուրիշներին այնպես, ինչպես ուրիշներից են եկել իրենց։ Ուստի պահպանվում է իրերի բնական կարգը» (Kritovoulos., նշվ. աշխ., էջ 12)։

փառները, ի դեմս Սքուլարիոսի, կարծում էին, որ Եվրոպայի ազդեցությունը կթուլացնի իրենց դիրքերը, իսկ օտարների ներխուժումն ավելի կուժեղանա¹⁰:

Գուցե Սքուլարիոսի՝ կաթոլիկ եկեղեցու հետ միացման հարցում ունեցած ընդդիմադիր կեցվածքն է պատճառը, որ Մեհմեդը բարձր է գնահատել նրան՝ լավ հասկանալով, որ Սքուլարիոսին պատրիարք ընտրելով՝ կկանխի Եվրոպայի հետ ուղղափառների որևէ հնարավոր մերձեցում: Ասենք, որ Մեհմեդը, Սքուլարիոսին պատրիարք ընտրելով, հետապնդում էր նաև այլ նպատակներ: Նախ, հոգևոր առաջնորդի առկայության դեպքում մայրաքաղաք կգային այն բոլոր քրիստոնյաները, որոնք վախենում կամ խուսափում էին այնտեղ վերադառնալուց¹¹: Բացի այդ, հոգևոր առաջնորդը կկարողանար իրեն ենթարկել ամբողջ միլիթը, իսկ կառավարման այս ձևը ավելի հեշտ կլիներ, և, վերջապես, Սքուլարիոսին որոշ արտոնություններ տալով՝ Մեհմեդը հող կնախապատրաստեր մյուս՝ հայ ու հրեա միլիթների և նրանց առաջնորդների դժգոհության համար¹²: Այս ճանապարհով նա ոչ միայն կանխում էր ոչ մահմեդականների որևէ մերձեցում, այլև արհեստականորեն տարաձայնություն էր առաջացնում նրանց միջև: Հույն պատրիարքին տրված այդ արտոնությունները հետագայում հույն-հայկական հարաբերությունների սրման պատճառ դարձան:

Գենադիոսին պատրիարք նշանակելուց հետո սուլթանը նրան իրավունք տվեց ունենալ եկեղեցական դատարան՝ հոգևոր սինոդ, որը պիտի լուծեր այն բոլոր հարցերը, որ վերաբերում էին հույների ներքին կյանքին՝ ամուսնություն, Զատկի տոնը ինքնուրույն տոնելու իրավունք և այլն: Հույն հոգևորականները պիտի ազատվեին հարկերից: Սա, իհարկե շատ կարևոր էր Կ. Պոլսի հույն համայնքի հետագա զարգացման համար, սակայն Մեհմեդի տված արտոնությունները և՛ ձևական էին, և՛ ժամանակավոր:

Բավական սուր էր դրված հունական եկեղեցիների հարցը: Կոստանդնուպոլիսը գրավելուց մի քանի օր անց Մեհմեդը մտնում է քաղաք, շարժվում դեպի Ս. Սոֆիայի տաճարը, գլուխ խոնարհում և երկար ժամանակ փառաբանում ալլահին: Նա ներում է շնորհում տաճարում գտնվող մի քանի քրիստոնյաների¹³: Տաճարը, որ հույն ազգի և միաժամանակ մյուս քրիստոնյաների սրբության ու վեհության խորհրդանիշն էր, դարեր շարունակ գայթակղում էր սուլթաններին:

¹⁰ **Удальцова З. В.**, *Борьба партий в Византии и Виссарион Никейский (Византийский временник, М., 1949, N 2, с. 299); Сказкин С. Д.*, *История Византии, т.3, М., 1967, с. 178.*

¹¹ **Inalcik H.**, *The Ottoman Empire: Conquest, Organization and Economy, London, 1978, p. 236.*

¹² Հայտնի է, որ Գենադիոսին պատրիարք նշանակելուց հետո Մեհմեդը ճանաչել է նաև հայկական ու հրեական միլիթները՝ նրանց հոգևոր առաջնորդ նշանակելով Հովակիմին և Մոսես Կապսալին: Սակայն հետաքրքիր է, որ Կրիստովուլոսը, խոսելով հրեական միլիթի ճանաչման և նրա առաջնորդ Կապսալի մասին, չի հիշատակում հայկական միլիթի ճանաչման ու Հովակիմի պատրիարք դառնալու հանգամանքը:

¹³ **Рансимин С.**, *«Паден, еяКонстант, нополяея» 453г.», М., 1983, г. 133. я*

Ս. Սոֆիայի (հուն.՝ իմաստություն) տաճարը կառուցվել է Կոստանդինոս Մեծի (IV դ.) ժամանակ։ Սկզբնապես այն քառանկյուն շինություն է եղել, սակայն հետագայում ընդարձակվել է, դարձել հսկայական մի համալիր, իսկ Կոստանդնուպոլսի անկման վերջին տարիներին՝ պատրիարքների աթոռանիստը¹⁴։ Անգամ Կրիստովուպոլսը ցավով է նկարագրում թուրքերի կողմից եկեղեցիների ավերումը. «Ինչպե՞ս կարող է մարդը դա բացատրել։ Նրանք սուրբ մասունքները գցում են հատակին կամ այրում կրակների մեջ։ Սուրբ գրքերը վաճառվում են, զոհասեղանները քանդվում են հիմնահատակ, շինությունները փորվում են ոսկի գտնելու նպատակով»¹⁵։ Բացի Ս. Սոֆիայի տաճարից, թուրքերը թալանել ու ավերել են նաև մյուս եկեղեցիները, իսկ շրջակա բնակչությանը տեղահան արել։ Համեմատաբար քիչ են տուժել մեծ մասամբ հույներով բնակեցված Պետրիոնը, Ֆեները, Ստուդիոնը և Սամաթիան։ Ըստ Ս. Ռանսիմենի՝ գրավումից անմիջապես հետո Մեհմեդի հրամանով միայն Ս. Սոֆիայի տաճարն էր վերածվելու մզկիթի¹⁶։

Մեհմեդը եկեղեցիներից մի քանիսը հույներից վերցրել և տվել է հայերին։ Կա կարծիք, որ XVIII դարում Կ. Պոլսում բյուզանդական շրջանից միայն երեք եկեղեցի էր մնացել։ Դրանցից մեկը հայտնի էր Ս. Մարիամ անվամբ։ Այս եկեղեցին պահպանվել է Մեհմեդի հատուկ ֆերմանի համաձայն՝ շնորհիվ նրա սիրելի՝ ազգությամբ հույն ճարտարապետ Խրիստոդուլոսի։ Մյուս երկուսը՝ Ս. Դիմիտրիոն և Ս. Գեորգ Կիպարիսցին, բավական փոքր էին և հավանաբար այդ պատճառով աննկատ էին մնացել թշնամուց¹⁷։ Բյուզանդագետ Ա. Պասպատին ներկայացնում է մի քանի հունական եկեղեցիների պատմությունն ու ճակատագիրը։ Սոֆիայի տաճարից բացի, շատ եկեղեցիներ մզկիթի վերածվեցին։ Դրանցից է Պամակարիստայի տաճարը (Ֆեթիյե ջամիսի), որը միայն 1545 թ. է վերածվել մզկիթի¹⁸։ Հ. Սիրունին նշում է 8 հունական եկեղեցիների անուններ, որոնք Մեհմեդի ժամանակ մզկիթներ են դարձել։ Սակայն թուրքերը չեն բավարարվել այսքանով։ Հետագա դարերում էլ նրանք ամեն ջանք գործադրել են հույներից նրանց եկեղեցիները խլելու համար։

¹⁴ **Ինձիճեան Ղ.**, Աշխարհագրութիւն չորից մասանց աշխարհի, հ. Ե, Վենետիկ, 1804, էջ 144։ Ս. Սոֆիայի տաճարը համարվում է բոլոր դարերի ճարտարապետության գլուխգործոցներից մեկը, որը կառուցվել է երկու տաղանդավոր ճարտարապետների՝ Թիմիոսի և Իսիդոր Միլեթացու կողմից։ Կա կարծիք, որ նրանք հայկական ծագում են ունեցել և մասնակցել են նաև Ս. Առաքյալների վանքի կառուցմանը (**Тер-Газарян Р., Армяне на Византийском престоле (Византийское наследство, Е., 2002, N 3, с. 37-38)**)։

¹⁵ **Kritovoulos.**, նշվ. աշխ., էջ 73-74։

¹⁶ **Рансимин С.,** նշվ. աշխ., էջ 140։

¹⁷ Նույն տեղում, էջ 140-141։

¹⁸ Սա բյուզանդական շրջանի հայտնի եկեղեցիներից էր և աչքի էր ընկնում իր ճոխությամբ ու գեղեցկությամբ։ Մեհմեդ II-ի օրոք այն կարճ ժամանակով դարձել է պատրիարքանիստ եկեղեցի, սակայն հետագայում Սքոլարիոսի խնդրանքով Մեհմեդը տեղափոխել է պատրիարքի նստավայրը։ Չնայած դրան, եկեղեցին չի կորցրել իր հեղինակությունը և մինչ XVI դ. Հիշատակվում է որպես հունական (*Πασπατη Α., Βηζαντιναί Μελεται, Κωνσταντινοπολεις, 1877, σ 298-299*)։

Վավերագրերից մեկի համաձայն՝ 1564 թ. Սամաթիայի Ալթը Մերմեր վայրի Սեյիդ Օմեր թաղամասի մահմեդականները բողոքել են՝ ասելով, որ հույները այնտեղ նոր եկեղեցի են կառուցել և դիմել են կառավարությանը՝ քանդելու այն: Հույները խնդրել են չավերել՝ նշելով, որ եկեղեցին իրենց Մեհմեդ II-ն է տվել և նույնիսկ Սելիմ I-ի ժամանակ չի ավերվել¹⁹: Հույներն ամեն գնով ցանկանում էին պահել բյուզանդական շրջանից ստացած իրենց վերջին պատառիկները: Նույն վավերագիրը վկայում է, որ հույները որպես գրավոր ապացույց են ներկայացրել Գ. Պոլսի գրավումից հետո (1498 թ.) Խալիլ անունով մի անձնավորության կողմից կնքված փաստաթուղթ, որտեղ նշվում է. «Ալթը Մերմերի մոտակայքում Բաշուկլոզ անունով քահանայի տրամադրության տակ գտնվող հին եկեղեցին օգտագործելու համար հանձնվել է նրանց (հույներին-Բ. Մ.)»²⁰: Չնայած հույների գործադրած մեծ ջանքերին՝ կառավարությունը հրամայում է նրանցից վերցնել եկեղեցին և քանդել:

Հայտնի է, որ Սելիմ I-ը ևս մեծ քանակությամբ հունական եկեղեցիներ է ավերել կամ մզկիթների վերածել: Սելիմի ոչ հանդուրժողական վերաբերմունքի մասին են վկայում նույն վավերագիրը և Գ. Այվազովսկու հետևյալ տողերը. «Յայնժամ հրաման ետ Սելիմ մեծի վեզիրին գամենայն եկեղեցիս քրիստոնէից փոխել 'ի մզկիթս, խափանել գամենայն զաստուածային պաշտամունս, և մահու պարտ առնել առ հասարակ զքրիստոնէայս՝ որ չկամիցին ուրանալ 'ի հայրենի հաւատոցն քրիստոնէութեան»²¹: Հունական եկեղեցիները մզկիթների վերածելու քաղաքականությունը շարունակվել է նաև հետագա դարերում:

Թեև Կոստանդնուպոլսի անկումից հետո հունական արվեստը անկում ապրեց, սակայն XV դ. ի վեր հույները սկսեցին ակտիվ դեր խաղալ Օսմանյան կայսրության առևտրի և արհեստների բնագավառներում: Հույները տարիներ շարունակ կարևոր տեղ էին գրավում պետական համակարգում, նրանցից շատերը սերնդեսերունդ զբաղեցնում էին վարչական տարբեր պաշտոններ²²: Խոշոր քաղաքներում, ինչպիսիք են Կոստանդնուպոլիսը, Ջուրտոնիան, Մալոնիկը և այլն, նրանք շարունակում էին առևտրական գործունեություն ծավալել:

Մեհմեդ II-ը լավ էր հասկանում հույն ժողովրդի դերն ու նշանակությունը կայսրության համար, ուստի հույն արհեստավորներին ու առևտրականներին տալիս էր ազատ գործունեության իրավունք: Ըստ Կրիստովուլոսի՝ քաղաքում

¹⁹ Փափագյան Ավ., Թուրքական վավերագրերը Հայաստանի և հայերի մասին (XVI-XIX դդ), Ե., 1999, էջ 209:

²⁰ Հավանաբար, ճիշտ է Ավ. Փափագյանի կարծիքը, որ քահանայի անունը ոչ թե Բաշուկլոզ է, այլ Բասիկլոզ, ավելի ճիշտ՝ հույների մեջ շատ տարածված Վասիլիոզ: Վավերագիրը վերաբերում է 1564 թ.: Այստեղ նշվում է. «Այդ ժամանակվանից ի վեր անցել է 66 տարի», այսինքն, խոսքը 1498 թ. մասին է (նույն տեղում, էջ 210):

²¹ Նույն տեղում, էջ 209-210, Այվազովսկի Գ., Պատմութիւն Օսմանեան պետութեան. հ. Ա. Վենետիկ, 1841, էջ 302: Հեղինակը նշում է նաև, որ հույների պատրիարքը սուլթանին հիշեցնում է Մեհմեդ II-ի հրամանը, համաձայն որի, հունական եկեղեցիները այլևս երբեք մզկիթի չէին վերածվելու, «և չխափանել զպաշտամունս նոցա և զհանդես Ջատկին»: Սակայն պատրիարքը, չունենալով գրավոր ապացույց, պատվիրում է բերել երեք զառամյալ ենիչերիների, որոնք հաստատում են նրա վկայությունը:

²² Βακαλοπουλος Α., *Νεα Ελληνική Ιστορία, Θεσσαλονίκη, 2003, σ 82.*

վերաբնակեցվածներին նա տալիս էր հող, տներ, անասուններ, նույնիսկ որոշ ժամանակով ազատում հարկերից²³։ Ըստ թուրք պատմաբան Հ. Ինալչիկի՝ այդ պատճառով Մեհմեդը առաջացրել է իր շրջապատի դժգոհությունը²⁴։ Չնայած դրան՝ նրա քաղաքականությունը շարունակել են նաև հաջորդները, ինչպես օրինակ՝ Բայազետ II-ը։ Այն մասին, որ հույները կարևոր դեր էին կատարում Օսմանյան կայսրությունում, խոսում է ոչ միայն հույն, այլև թուրք պատմագրությունը, մասնավորապես՝ Հ. Ինալչիկը. որը նշում է. «Հույներն ունեին որոշակի ազդեցություն պալատներում և պետական գործերում»²⁵։

Հույն, հայ և հրեա արհեստավորների, ինչպես նաև առևտրականների համարվր վաղուց դուրս էր եկել Օսմանյան կայսրության սահմաններից։ Նրանք բարձր գնահատականի էին արժանանում նաև Եվրոպայում։ Ֆրանսիան Ֆրանցիսկոս I-ի ժամանակ (1494-1547) Օսմանյան կայսրության հետ կնքեց առևտրական պայմանագիր, որն իր տեսակի մեջ առաջինն էր Եվրոպայի հետ Թուրքիայի հարաբերություններում։ Դա կնքվեց ֆրանսիացիներին արդեն հայտնի հունական առևտրական կազմակերպությունների (*diomologhseis*) շնորհիվ։ Այս պայմանագրով էր սկզբնավորվում հանրածանոթ կապիտուլյացիոն ռեժիմը։ Հետագայում այդ դաշնագրերը նորոգվեցին 1604 և 1673 թթ., և, բացի այդ, թուրքերը համանման առևտրական պայմանագիրը կնքեցին նաև Անգլիայի հետ²⁶։

Մեհմեդը մեծ հետաքրքրություն ուներ արհեստների նկատմամբ։ Նա իր պալատ էր հրավիրում Արևելքի ճարտարապետներին, սակայն ամենից շատ՝ հույներին։ Ինքը պալատում ուներ մի քանի անձնական նկարիչներ²⁷։ Նրա ժամանակաշրջանի ոչ մի աշխատանք չի պահպանվել, քանի որ Բայազետ II-ը ոչնչացրել է դրանք։ Այս ժամանակներից են պահպանվել հույների «Երեքգլխանի օձ» կոթողը, ինչպես նաև Այս Սոֆիայի մի շարք խճանկարներ²⁸։ Բնականաբար, ընդօրինակելով բռնակալին, Մեհմեդի արքունիքը ձևացնում էր, թե հասկանում և գնահատում է հունական արվեստը²⁹։ Հույները նախնիներից ժառանգել էին մի շարք արհեստներ (նավաշինություն, թիթեղագործություն, զինագործություն, դարբնություն, կաշեգործություն, ձկնորսություն, հյուսնություն և այլն), որոնք շարունակեցին օսմանյան շրջանում։ Նրանք հմուտ մսագործներ, կոշկակարներ, ոսկերիչներ, կաթնագործներ էին։ Մանր առևտրականության մեջ հայտնի էին

²³ Kritovoulos., նշվ. աշխ., էջ 139։

²⁴ Inalchik H., նշվ. աշխ., էջ 246։

²⁵ Նույն տեղում։

²⁶ Βακαλοπουλος Α., նշվ. աշխ., էջ 83։ Ալպոյաճյան Ա., Ազգային սահմանադրությունը, իր ծագումը և կիրառությունը։ Ընդարձակ օրացույց Ս. Փրկչյան հիվանդանոցի, Կ. Պոլիս, 1910, էջ 264։

²⁷ Մեհմեդ II-ի պալատական նկարիչներից էր իտալացի Ջենտիլ Բելլինին, որը պիտի նկարեր սուլթանի դիմանկարը։ Ժամանակակիցները վկայում են, որ սուլթանը կտրել է իր ստրուկներից մեկի գլուխը, որպեսզի այս նկարչին ցույց տա պարանոցի մկանների ջղաձգումը Վ.Сказкин С., История Византии, т. 3, М., 1967, с. 186)։

²⁸ Babinger F., Mehmed the Conqueror and His Time, Princeton – New Jersey, 1978, p. 469.

²⁹ Βακαλοπουλος Α., նշվ. աշխ., էջ 53։

հատկապես լերերի (խոշոր սիսեռի աղանդեր), նաև բանջարեղեն, շագանակ ու հնոտի վաճառողները³⁰: Փաստորեն, հույն արհեստավորի աշխատանքն անհրաժեշտ էր կյանքի բոլոր բնագավառներում: Ահա թե ինչու էին մահմեդականները սկզբնապես մեծահոգաբար վերաբերվում քրիստոնյա արհեստավորներին: Սակայն դա ժամանակավոր էր, քանի որ մահմեդականները հետագայում քրիստոնյաներից սովորեցին շատ հմտություններ և նրանց դուրս մղեցին արհեստների, մասնավորապես արհեստավորական վերնախավի շարքերից:

XV դարում Կոստանդնուպոլսի հույն համայնքը մեծ դեր ուներ Օսմանյան կայսրության տնտեսության զարգացման գործում: Պետությանը մեծ եկամուտ էին բերում հույներով բնակեցված Դալաթիան և Բերան: Հույն ապակեգործները բնակվում էին Ֆեներ և Խասքոյ թաղամասերում: Ֆեներում էին ապրում նաև հույն ոսկերիչները: Թե՛ ապակեգործությունը, թե՛ ոսկերչությունը բավական եկամտաբեր արհեստներ էին: Հավանաբար, այս հանգամանքն է պատճառը, որ Ֆեների հույները աչքի էին ընկնում իրենց հարստությամբ: Թաղամասի անունով հարուստ հույները շուտով կոչվեցին ֆանարիոտներ (*fanarioteis*), որոնք հետագա դարերում մեծ դեր խաղացին հույն ժողովրդի պատմության մեջ³¹: Հայտնի չէ, թե կոնկրետ որտեղ էին բնակվում հույն կաշեգործները և կոշկակարները: Իրենց արհեստների բնույթին համապատասխան՝ հավանաբար, նրանք սփռված էին քրիստոնյաներով բնակեցված թաղամասերում և իրար հետ ակտիվ առևտրական կապերի մեջ էին քաղաքի և դրսի շուկաներում: Քաղաքը կաշի էր ներմուծում հիմնականում Բալկաններից: Կաշվի առևտուրը, մշակումը և վաճառքը իրականացնում էին հույները:

Բացի հույներից, Կոստանդնուպոլսում բնակվող հայերը և հրեաները ևս զբաղվում էին արհեստներով ու առևտրով: Նրանք իրենց կարևորությամբ հետ չէին մնում հույներից, ուստի վերջիններիս հետ հաճախ գտնվում էին տնտեսական լուրջ մրցակցության մեջ: Ավելացնենք, որ Օսմանյան կայսրության առանձին բնակավայրերում արհեստի որևէ ճյուղի մենաշնորհը պատկանում էր կա՛մ հույներին, կա՛մ հայերին: Օրինակ՝ Սիրիայում ակնեղենի արտադրության մենաշնորհը հայերինն էր: Ապակու արտադրությունը հույների ավանդական արհեստն էր ոչ միայն Կ. Պոլսում, այլ Հեբրոնում: Հույն հմուտ ձկնորսներ կային Մենգալայում, Բուլուսի լճերի մերձակայքում և այլուր³²:

XVII դ. վերջի և XVIII դ. սկզբի Կոստանդնուպոլսի ներքին կյանքի մասին է խոսում ֆրանսիացի ճանապարհորդ դը Լա Մոտրեն. «Կը հիշե նաև, որ Թուրքիո մեջ քիչ թիվով հույն և ավելի քիչ թիվով հայ մուրացկաններ կան»: Հեղինակը դա բացատրում է սննդի էթանությամբ³³, սակայն ավելի տրամաբանական է այն, որ հույներն ու հայերը, կամ նրանց մեծ մասը, ունեին իրենց մշտական զբաղմունքը և կարողանում էին վաստակել թեկուզ համեստ գումար:

³⁰ Τριανταφυλίδης Μ., *Νέα ελληνική γραμματική*, Αθήνα, 1989, σ.108.

³¹ Βακαλοπουλος Α., նշվ. աշխ., էջ 49:

³² Gibb A. and Bowen H., *Islamic Society and the West, part I*, G.B., 1951, p. 299.

³³ Քյուրթյան Հ., Ա. Տը Լա Մոտրեի ուղեգրությունն՝ հայոց մասին (Հայրենիք, Բոստոն, 1950, N 6, էջ 99):

XV-XVII դդ. Կ. Պոլսի հույն համայնքն աչքի էր ընկնում իր բնակչության տարաբնույթ շերտերով: Հիմնական մասն այն հույներն էին, որոնք կա՛մ բնակվել էին դեռևս բյուզանդական շրջանից, կա՛մ նրանք, որոնց Մեհմեդ II-ը տեղահանել էր իրենց բնակավայրերից: Սակայն Կոստանդնուպոլիսն անընդհատ համալրվում էր նոր բնակչությամբ, քանի որ Մեհմեդի կազմակերպած բռնագաղթեցումները շարունակվում էին նաև հետագա դարերում: Նորեկները, հատկապես նրանք, որ գաղթել էին Կարամանից, Պոնտոսից, Իզմիրից, իրենց հետ բերել էին մասնագիտական նոր հմտություններ և մրցակցության մեջ մտել տեղացիների հետ: Նրանցից շատերը կարճ ժամանակում համալրել էին հարուստ ֆանարիոտների դասը:

XVI դ. հրեաները իրենց տնտեսության թվաքանակով գերազանցում էին հույներին: Համաձայն 1540 թ. հարկացուցակներից մեկի՝ Կ. Պոլսում բնակվող հույները, հայերը և հրեաները ունեին բազմաթիվ տնտեսություններ. հրեաները՝ 1522 տնտեսություն, հույները՝ 1457, հայերը՝ 807: Փաստորեն, հույներն իրենց տնտեսությամբ գրավում էին երկրորդ տեղը՝ զիջելով հրեաներին³⁴:

Կոստանդնուպոլսի ոչ մահմեդական բնակիչները, անկախ տնտեսական մրցակցությունից, միմյանց հետ սերտ հարաբերությունների մեջ էին, իսկ անհրաժեշտության դեպքում օգնում էին միմյանց: Օրինակ՝ 1629 թ. թուրքերը առևանգում են մի հույն տղայի: Հույների հոգևոր առաջնորդը հայերից աջակցություն է խնդրում. «Օգնեցե՛ք մեզ վասն հաւատոյ, այսօր մեզ է, վաղն ձեզ է...»³⁵: Այդ հարաբերությունները ձեռնառու չէին օսմանյան աստիճանավորներին, ուստի պետությունը հնարավորինս կանխում էր հույն-հայկական որևէ մերձեցում: Նրան մեծ անհանգստություն էր պատճառում քրիստոնյաների թվաքանակի մեծանալը, և XVI դարից վերջիններս սկսում են վտարվել մայրաքաղաքից, որի հետևանքով ժամանակի ընթացքում շատ թաղամասեր լքվում են: Դրանցից էին Էյուբը, Ակսարայը (Ակսարայից եկած գաղթականների թաղամաս) և այլն: Պետությունը քրիստոնյաներին հեռացնում էր իրենց թաղամասերից՝ պատրվակ բռնելով տեղի մահմեդականների անհիմն բողոքները, որոնց համաձայն, իբր քրիստոնյաները գինետներ են բացում, աղմկում և «խանգարում խաղաղ կյանքը»³⁶: Կ. Պոլսի կադիին 1559 թ. տրված հրամանագրերից մեկում ասվում է. «Կ. Պոլսի Այա Սոֆիայի վակֆերից՝ Մահմուդ փաշայի խանում իջևանող առևտրականները խնդրագիր են ներկայացրել, որտեղ հայտնում են, որ տվյալ խանի մի շարք խցերի մեջ անհավատ մուշտակավաճառներ բնակվելով, խանի դարպասի երկու կողմերում փայտից և գերանից տնակներ և խանութներ են կառուցել և գիշեր-ցերեկ օջախների շուրջ հավաքվելով, շատախոսում են և նույնիսկ տվյալ խանի մզկիթի մեջ մահմեդականներ գտնվելու ընթացքում՝ բարձրաձայն խոսում»³⁷:

³⁴ Тодоров Н., *Балканский город XV-XIX веков*, М., 1976, с. 68-69, Խառատյան Ա., Հայ-հունական եկեղեցական հարաբերությունները Կ. Պոլսում (Պատմա-բանասիրական հանդես, Ե., 2004, N 1, էջ 51):

³⁵ Ժամանակագրություն Գրիգորի Վարդապետի Կամախեցույ, Երուսաղեմ, 1915, էջ 193:

³⁶ Гордлевский В. А., *Избранные сочинения (Стамбул в XVI веке)*, т. IV, М., 1968, с. 60.9

³⁷ Փափազյան Ավ., նշվ. աշխ., էջ 206:

Վավերագիրը վկայում է, որ այս ճանապարհով թուրքերն իրականացնում էին մի քանի նպատակ: Նախ, խանգարում էին հույն առևտրականներին որևէ գործունեություն ծավալել, հետո հեշտությամբ ազատվում արդեն անցանկալի դարձած քրիստոնյաներից:

XVI-XVII դդ. հույն արհեստավորները սկսեցին միավորվել կորպորատիվ միություններում: Դրանք կազմակերպություններ էին, որտեղ անդամագրվում էին միևնույն մասնագիտության տեր մարդիկ (էսնաֆություններ): Այդպիսի կազմակերպություններ էին ստեղծում նավաշինարարները, դարբինները, ապակեգործները, նավաստիները և այլն³⁸: Յուրաքանչյուր էսնաֆություն ուներ իր ներքին կանոնադրությունը, ընդհանուր գանձարանը, որից օգնություն էին տալիս չքավոր անդամներին: Դրանց գոյությունը հեշտացնում էր ապրանքի վաճառքը: Բացի ընդհանուր կանոնադրությունից, էսնաֆություններն ունեին իրենց ներքին կանոնադրությունը, որտեղ հանգամանորեն նկարագրվում էին նրանց ընդհանուր գործունեությունը, շահերը, նպատակները: Էսնաֆությունների մասին մեր ձեռքի տակ եղած հիշատակարանը վերաբերում է կաշեգործ-մորթեգործների խմբին: Կան կանոններ, որ առնչվում են մորթու, կաշվի մշակմանը, գունավորմանը: Հունական էսնաֆությունները մշտապես շփման մեջ էին մյուս միլիթների և պատկանող իրենց արհեստակիցների հետ, որի շնորհիվ ձեռք էին բերում նոր հմտություններ³⁹: Ըստ Ա. Վակալուպուլոսի՝ հունական էսնաֆությունների վրա մեծ ազդեցություն ունեին մահմեդականները: Չնայած հույները ժառանգաբար փոխանցում էին իրենց արհեստների իմացությունը, սակայն մահմեդականների հետ նրանք փոխշփման մեջ էին, որի հետևանքով հետագայում համադրվում էին հունական և արևելյան արհեստները⁴⁰:

Էսնաֆություններն ունեին իրենց գանձարանը, որտեղ պահվում էին անդամներից գանձվող անդամավճարները, փոքր խնայողությունները, որոնք ժամանակի ընթացքում այնքան մեծ գումարներ էին դառնում, որ պետությունն ուշադրություն էր դարձնում դրանց վրա: Պողոս Կադզվանցին հիշատակում է մի դեպք, երբ 1679 թ. կառավարությունը հույներից, հայերից, հրեաներից մեծ չափով արծաթ էր պահանջում արժեզրկված դրամի՝ ակչեի փոխարեն. «... նախ՝ ի յունաց՝ հինգ հազար օխայ արծաթ տալ ի գործարան դրամահատութեան: Նոյնպէս ի հրէից, երեք հազար օխայ, և ի հայոց չորս հազար օխայ. եթէ յէսնաֆաց. և եթէ յեկեղեցեաց. և այլ ուստի և իցէ պատրաստել և տալ՝ որպէս ասացի ի տպարանս դրամոյ...»⁴¹:

Հայ և հույն էսնաֆությունները հաճախ էին համագործակցում իրար հետ: Հայտնի է, որ XVI դ. Կ. Պոլսում հայ բեռնակիրները գաղտնի կազմակերպում են հույն հոգևորականի թաղումը, որին արգելել էին թաղել «զօրենս Աստուծոյ»⁴²:

³⁸ Βακαλοπουλος Α., նշվ. աշխ., էջ 52:

³⁹ Նույն տեղում:

⁴⁰ Նույն տեղում:

⁴¹ Աղանեանց Գ., Դիվան հայոց պատմութեան, գիրք Ժ, Կ. Պոլիս, 1912, էջ 335:

⁴² Նույն տեղում, էջ 84:

XV-XVII դդ. Օսմանյան կայսրությունում հստակ տարանջատում չկար արհեստների և առևտրի միջև: Արհեստավորը հաճախ վաճառում էր նաև իր արտադրանքը: Դեռևս XV դարում Մեհմեդ II-ը հետաքրքրություն էր ցուցաբերում նաև առևտրի նկատմամբ, ուստի քաղաք էր բերում հատկապես այն հույներին, որոնք կապ ունեին Արևմուտքի հետ⁴³: Դրանցից էին հույն նավաշինարարները, ձկնորսները, գինեվաճառները և բոլոր նրանք, ովքեր հաճախ էին շփվում օտարերկրացիների հետ, տիրապետում էին մի քանի լեզուների: Հիմնավոր է Ա. Վակալուպուլոսի այն կարծիքը, որ XV-XVII դդ. հույները Օսմանյան կայսրության տնտեսության զարգացման խթանիչներից էին: Նրանք լավ թարգմանիչներ էին, զբաղվում էին միջնորդ առևտրով: Հատկապես ակտիվ էր նրանց կապը Անգլիայի, Ավստրոհունգարիայի, Գերմանիայի և եվրոպական այլ երկրների հետ: Գերմանիան հույներից գնում էր բամբակե թելեր, բուրդ, ծխախոտ և վաճառում մահուդ, գործվածքեղեն և այլն⁴⁴:

XV-XVII դդ. բավական սերտ էին անգլո-թուրքական առևտրական հարաբերությունները, որտեղ ակտիվ գործունեություն էին ծավալում հույն և հայ առևտրականները, հրեա դրամատերերը: Անգլիական ապրանքն ամենուր մրցակցում էր հունականի հետ (օրինակ՝ անգլիական բամբակը Մակեդոնիայում):

Հույն առևտրականները ակտիվ էին նաև Լեվանտի առևտրում: Այստեղ մեծ մրցակցություն կար հույն և իտալացի ձկնավաճառների միջև. հույները հետագայում կարողացան նրանց դուրս մղել այդտեղից: Մայրաքաղաքը Իրանից և Դրիմից Կաֆայով ստանում էր ցորեն, ալյուր, մեղր: Լեվանտի առևտրում կարևոր նավահանգիստներ էին Քիլիան ու Աքքերմանը: Այստեղ ևս իրենց ակտիվ գործունեությամբ աչքի էին ընկնում հույն ձկնավաճառները, հայ միջնորդները և հրեա սեղանավորները⁴⁵: Պետության կողմից ստեղծված Լեվանտի առևտրական կազմակերպությունը վերահսկում էր արտաքին առևտուրը, երկրի ներսում իր վրա էր վերցնում Ստամբուլի դեսպանատների պահպանման հետ կապված ծախսերը: Կային նաև հույն, հայ, հրեա առևտրականներ ու միջնորդներ, որոնց կազմակերպությունը ռոճիկ էր վճարում⁴⁶: Նրա ուշադրության կենտրոնում էր նաև Կաֆայի առևտուրը: Կաֆայից ցորեն, ալյուր, կարագ, պանիր, մեղր և այլ մթերքներ էին ներմուծվում մայրաքաղաք⁴⁷: Այս առևտրական ճանապարհը երկար ժամանակ գտնվում էր թաթարների հսկողության տակ, որոնք մեծ դժվարություններ էին ստեղծում առևտրականների համար: XV-XVII դդ. այդ դժվարությունները հարթում էին տեղի հայ և հույն բնակիչները, որոնք ազդեցիկ էին տարածաշրջանի քաղաքական ու տնտեսական կյանքում: Նրանց բարձր հեղինակության մասին է խոսում XVIII դ.

⁴³ **Mantran R.**, *Foreign Merchants and the Minorities in Istanbul during the Sixteenth and Seventeenth Centuries* (Braude B. *Christians and Jews in the Ottoman Empire, London-New York, 1983, p. 128*).

⁴⁴ **Βακαλοπουλος Α.**, նշվ. աշխ., էջ 82, 85:

⁴⁵ **Inalcik H.**, *The Ottoman Empire. The Classical Age 1300-1600. New York-Washington, 1973, p. 129-130*.

⁴⁶ **Гордлевский В. А.**, նշվ. աշխ., էջ 29:

⁴⁷ **Inalcik H.**, նշվ. աշխ., էջ 130:

թուրք հեղինակը, որը նշում է, որ Կաֆայի հիմնական բնակիչները ոչ թե թաթարներն են, այլ հույներն ու հայերը⁴⁸:

Հույներն ակտիվորեն մասնակցում էին և՛ Լեվանտի, և՛ անգլոթուրքական, և՛ գերմանաթուրքական, նույնիսկ պարսկաթուրքական առևտրին: Մետաքսի առևտրի կենտրոն էր Բուրսան, որտեղ հույն բնակչության ստվար զանգված կար: Այս ամենը մեզ թույլ է տալիս եզրակացնելու, որ թուրք պատմաբան Հ. Բնալջիկը չափազանցնում է, թե թուրքերը տնտեսական փայլուն գործունեություն էին ծավալում Օսմանյան կայսրությունում⁴⁹: Իրականում նրանք լոկ վարչական պաշտոններ էին զբաղեցնում: Միայն XVII-XVIII դդ. թուրքերը կարողացան ակտիվորեն ներթափանցել շուկայական հարաբերությունների ոլորտ: Այստեղ նրանք հանդիպեցին հայերի, հույների, հրեաների լուրջ մրցակցությանը: Կառավարությունը, ի շահ թուրք առևտրականության, որոշ միջոցներ ձեռնարկեց, որի վատ ապացույցն էր 1635 թ. Մուրադ IV-ի արձակած ֆերմանը՝ Կեսարիայի բնակիչներին հետ ուղարկել իրենց նախկին բնակավայրերը⁵⁰: Հրամանը, իհարկե, չիրականացվեց, քանի որ հայերն ու հույներն արդեն իսկ սերտաճել էին տնտեսության և առևտրի հետ: Նրանք էին ընթացք տալիս միջազգային առևտրին: Նրանք գործում էին և՛ Սվազում ու Թոքաթում, որոնք գյուղատնտեսական ապրանքների կենտրոններ էին, և՛ Անկարայում, որը բրդի, ոչխարի, թելերի առևտրի կենտրոն էր, և՛ մետաքսի արդյունահանման կենտրոն Բուրսայում: Նրանց շարքերից շուտով առանձնացան շատ դրամատերեր և սեղանավորներ⁵¹:

Հայտնի է, որ հույները Կ. Պոլսում զբաղվում էին գինեվաճառությամբ: Մայրաքաղաքի համար գինու աղբյուր էին Հոռոս կղզին և Ղալաթիայի շրջակա գյուղերը: Գինի վաճառելը ևս ավանդական զբաղմունք էր հույների համար: Իրենց գինեվաճառությամբ հայտնի էին Վլանկան և Սամաթիան: Կառավարությունը խիստ միջոցներ էր կիրառում գինեվաճառների նկատմամբ: Սելիմ I-ի օրենքներից մեկի համաձայն, եթե որևէ մահմեդական գինի էր օգտագործում, ապա ոչ միայն արժանանում էր մարմնական պատիժների, այլև պարտավորվում էր յուրաքանչյուր երկու հարվածի համար նաև վճարել մեկ ալկե⁵²:

Սկզբական շրջանում գինու վաճառքը խստիվ արգելվում էր, քանի որ խիստ հակասում էր շարիաթի սկզբունքներին: Հետագայում թեև պետությունը չէր խրախուսում այն, սակայն հարկեր էր սահմանում գինեվաճառության համար: Մա կարելի է բացատրել նրանով, որ գինու վաճառքից ստացվող հարկը մեծ գումար էր կազմում, որից պետությունը չէր ցանկանում հրաժարվել: Ուստի, համաձայն օրենքի, գինի պիտի վաճառեին միայն քրիստոնյաներով բնակեցված թաղամասերում, օրինակ՝ Ղալաթիայում: Կառավարության և գինեվաճառների փոխհամաձայնությամբ որոշվում է, որ քաղաք գինի էր ներմուծվելու միայն գիշերով և խիստ

⁴⁸ Гордлевский В. А., նշվ. աշխ., էջ 27:

⁴⁹ Inalcik H., նշվ. աշխ., էջ 133:

⁵⁰ Mantran R., նշվ. աշխ., էջ 133:

⁵¹ Նույն տեղում, էջ 133, 134:

⁵² Тверитинова А., Книга законов султана Селима I, М., 1969, с. 35.я

գաղտնի: Վավերագրերից մեկում, որը վերաբերում է 1573 թ., այդ մասին ասվում է. «Արդ, հրամայում եմ, իմ հրամանը տեղ հասնելուն պես, հրեաներին, քրիստոնյա համայնքներին և նրանց ներկայացուցիչներին, ինչպես որ պետք է, զգուշացնես, որ դեպի քաղաք բացահայտորեն տակառներով ու տիկերով գինի և օղի չբերեն և գիշերվա ընթացքում գաղտնի կերպով բերած գինին չհամարձակվեն մահմեդականներին վաճառել: Իրար մեջ վաճառք հաստատելու ընթացքում թող գաղտնի հաստատեն և այնպես չանեն, որ իրենց տները գինետան տեսք ընդունի: Թույլ չտաս, որ բացահայտորեն գինի և օղի վաճառեն, և հարսանիքներում և այլ հավաքություններում նվագի կամ բարձր ձայն լսվի...»⁵³:

Ըստ վավերագրի, նախկինում ընդհանրապես արգելվել է գինեվաճառությունը, իսկ գինու հարկը վերացել: Նույնիսկ 1563 թ. վավերագրերից մեկի համաձայն՝ Կ. Պոլսի կադիին տրված հրամանագրում հրամայվում է սրճարանները և գինետները փակել, իսկ գինու առկայության դեպքում, մեջը աղ լցնելով, վերածել քացախի: Նույն ֆերմանով հրամայվում է փակել Կ. Պոլսի այն սրճարանները, որտեղ թաթարական գինի՝ բուգա է վաճառվում: Վավերագիրը վկայում է, որ նախկինում ևս նմանատիպ հրամաններ են եղել⁵⁴: Գինի վաճառելու արգելքը եկել է Մեհմեդ II-ի ժամանակաշրջանից: 1476 թ. հրատարակված մի վավերագրում ասվում է. «Հարկատու անհավատները (հույները, հայերը, հրեաները - Բ. Մ.) իրենց թաղում գտնվող գինետներից բացի մի այլ տեղ գինի չվաճառեն: Եվ իրենց այգու բերքից բացի, եթե մի այլ այգուց շիրա բերեն և իրենց տներում վաճառեն, ապա իմ հսկիչը հայտնաբերելու դեպքում գինին թող բեկլիք դարձնի և նրանց էլ պատժի»⁵⁵: Այնուամենայնիվ, կառավարությունը, տեսնելով, որ քրիստոնյաները գաղտնի գինի են ներմուծել, իսկ դա «վնաս է պատճառում պետական գանձարանին»⁵⁶, թույլ է տվել այն գաղտնի ներմուծել քաղաք, բացառությամբ ուրբաթ օրվա նամագի ժամերի:

Պետությունը ժամանակ առ ժամանակ ավելացրել է գինու վաճառքից ստացվող հարկը: Օրինակ՝ 1649 թ. Մեհմեդ փաշայի հրամանով հույն բեռնակիրներն ու գինեվաճառները պիտի *քյուրեկձի* հարկ վճարեին⁵⁷: Եղել են դեպքեր, երբ քրիստոնյաներին առհասարակ արգելվել է իրենց հողատարածքում խաղող աճեցնել: Սելիմ I-ի օրենքներից մեկի համաձայն, եթե «անհավատները» իրենց այգում խաղող էին աճեցնում, ապա, բացի սահմանված հարկից, էմիրին, վեզիրին պիտի վճարեին նաև ստացված մթերքի մի մասը⁵⁸: Փաստորեն, պետությունը ոչ թե ի վիճակի չէր արգելել գինեվաճառությունը, այլ շերիի արգելքին նայում էր ի միջի այլոց, քանի որ այդ առևտուրը մեծ եկամուտ էր բերում: Մակայն ժամանակ առ ժամանակ խստիվ արգելվում էր գինու ներմուծումը: XVII դարում մեծ վեզիր

⁵³ Փափագյան Ավ., նշվ. աշխ., էջ 219:

⁵⁴ Նույն տեղում, էջ 216:

⁵⁵ Նույն տեղում, էջ 130, 163:

⁵⁶ Նույն տեղում, էջ 218:

⁵⁷ Օրագրություն *Երեսիա Չելեպի Քեմիլբազեանի*, Երուսաղեմ, 1939, էջ 6-7:

⁵⁸ *Тверитинова А. С., Аграрный строй Османской империи XV-XVII вв. (документы и материалы), М., 1963, с. 51.я*

Քյոփրյուլու Ահմեդ փաշայի ժամանակ հույն գինեգործներին արգելվել է Մարմարայից բերած գինին քաղաք ներմուծել: Դրանք աշնան ամիսներն էին, և հույները, որն էլ չունենալով, գինին ծովն են թափել: Դրանից բավական մեծ վնաս են կրել հույն գինեգործները⁵⁹:

Եղել են դեպքեր, երբ հույն գինեվաճառները հայերի ու հրեաների հետ միասին կաշառել են դեսպաններին⁶⁰: Այդ է վկայում ֆրանսիացի ճանապարհորդը. «Որն է մեկը ուզածի չափ կարող է խաղող գնել, որ իր տանը (գինի) ճզմի: Սակայն, թուրքերը, որոնք նույնպես կրնան խաղող ծախել կամ ուտել, գինի չեն կրնար շինել կամ խմել, և ոչ ալ հույները, հայերը կամ հրեաները կրնան գինի վաճառել Կ. Պոլսո մեջ, բացի դեսպանին պաշտպանության տակ: Եվ, որովհետև այդ պաշտպանությունը (դեսպաններուն) նվերներ կ'արժե, այդ իսկ պատճառով գինին հոն (Կ. Պոլսո) մեջ կրկին գնով կը ծախվի»⁶¹: Սակայն գինու արժեքի կրկնակի բարձրացումն ու կառավարության կիրառած խիստ միջոցառումներն անգամ մահմեդականների այն քիչ օգտագործելու պատճառ չեն դառնում: Իրականում գինեվաճառության կանխումը դյուրին գործ չէր, քանի որ ոգելից խմիչք օգտագործում էին նաև արքունիքում: Սելիմ II-ը նույնիսկ ուներ «հարբեցող» (մեսո) մականունը: Սուրադ III-ի մերձավորը՝ Շուջա անվամբ, մեծ քանակությամբ գինի էր պահում⁶²: Այս իրավիճակը շարունակվել է նաև հաջորդ դարերում: XVII դ. վերջի - XVIII դ. սկզբի ֆրանսիացի ճանապարհորդ դը Լա Մոտրեի վկայությամբ՝ հակառակ այն բանի, որ թուրքերին արգելված էր գինի օգտագործելը, նրանք խմում էին քրիստոնյաներից շատ, իսկ դա մեծ շահույթ էր բերում հույն, հայ և հրեա գինեպաններին. «Թուրք վաճառողներն և խմողները ենթակա են «ֆալսայի»: Սակայն, իզուր, քանի որ օրենքը գործադրողներն իսկ անհագ խմողներ են»⁶³:

Հույները Կոստանդնուպոլսում զբաղվում էին նաև մանր ապրանքների և սուրճի առևտրով: Չնայած սուրճի վաճառքը և սրճարաններ բացելը շարիաթի սկզբունքով արգելված չէին, կառավարությունը չէր ցանկանում դրանց տարածումը: Սուրճ վաճառողները պիտի հարկ վճարեին՝ *թահմիս-ի քահվե* անվամբ: Հայտնի է Սուրադ VI-ի խիստ վերաբերմունքը ծխախոտի և սուրճի նկատմամբ: Դրա մասին Առաքել Դավրիժեցին գրում է. «Թուին ՌՁԲ(1633) յօգոստոս ամսոյ սուլթան Սուրատն սաստիկ եասախ արար թուրունին ընդ ամենայն աշխարհս տէրութեան իւրոյ, զամենայն դահվախանէք, որ ամենայն քաղաքս կային, քակեալ աւերեաց...»⁶⁴:

⁵⁹ Քեովիւրճեան Ե., Պատմութիւն համառօտ ԴՃ տարւոյ օսմանցոց թագաւորացն, Ե., 1982, էջ 265:

⁶⁰ Կոստանդնուպոլսում պաշտոնավարող դեսպանները կառավարության կողմից իրավունք էին ստացել ներմուծել այնպիսի սննդամթերք, որ արգելում էր մահմեդական կրոնը [գինին, խոզի միսը և այլն (Քյուրտյան Հ., նշվ. հոդվ., էջ 99)]:

⁶¹ Նույն տեղում, էջ 99:

⁶² Гордлевский В. А., նշվ. աշխ., էջ 35:

⁶³ Քյուրտյան Հ. Ա., նշվ. հոդվ., էջ 99:

⁶⁴ Առաքել Դավրիժեցի, Գիրք պատմութեան, Ե., 1990, էջ 433:

Փաստորեն, օսմանյան պետությունը XV դարում Կ. Պոլսում ձևավորվում էր մահմեդական կրոնի և նրա սկզբունքների գերազանցության հիման վրա: Եվ չնայած միլեթների համակարգի առկայությանը, այս կրոնը խիստ անտեսում էր ոչ մահմեդական բնակչությանը: Դա նկատվում էր կյանքի բոլոր բնագավառներում: Հայտնի է, որ Կ. Պոլսի փողոցներում ոչ մահմեդականները պիտի տարբերվեին առաջին իսկ հայացքից, իրավունք չունեին կրելու թանկարժեք զարդեր կամ վառ գույնի կոշիկներ: Այս դեպքում նրանք ընդհուպ մահվան կոատապարտվեին:

Հույների նկատմամբ բարյացակամ վերաբերմունքը XVI-XVII դդ. սկսում է աստիճանաբար նվազել: Նրանք հետ են մղվում արհեստների բնագավառում, չնայած շարունակում էին առաջատար տեղ գրավել հատկապես սևծովյան առևտրում և լուսնայափոխության ասպարեզում⁶⁵: Անկախ Օսմանյան կայսրությունում հույների, հայերի կամ հրեաների կարևոր դերից, նրանք ոչ ցանկալի տարրեր էին տիրող մահմեդականի համար: Քրիստոնյայի ու մահմեդականի իրավական տարբերությունը նկատելի էր կյանքի բոլոր բնագավառներում: Դարավոր սովորույթ էր դարձել հայերից և հույներից ապօրինի հարկերի գանձումը: Բացի սահմանված հարկերից, հարկահաններն ու տեղական կառավարման մարմիններն իրենց համար առանձին հարկեր էին սահմանում, ինչպես հագուստի, մթերքի, ճանապարհածախսի և այլ հարկեր: Հույները, հայերն ու հրեաները ոչ միայն գլխահարկ էին տալիս, որ գանձվում էր ամեն մի տղամարդուց, այլև համայնքը հարկ էր վճարում նույնիսկ աղոթատեղեր ազատ այցելելու, իր առանձին գերեզմանատան համար: Ականատեսը գրում է, որ հույն, հայ, հրեա տղամարդիկ տալիս էին մեկ չերվոնեց՝ որպես գլխահարկ: Ամեն տարի հույները եկեղեցիներ ազատ այցելելու համար տալիս էին 30 հազար չերվոնեց՝ համայնքի կողմից և 25 հազար՝ եկեղեցու կողմից: Թուրք կնոջ ամուսնության դեպքում վճարվում էր 4 գրիվին, իսկ քրիստոնյայի համար՝ մեկ չերվոնեց⁶⁶:

Վավերագրերից մեկի համաձայն՝ պետության հարկային քաղաքականությունից դժգոհել են բոլոր հարկատուները. «Մահմեդական, քրիստոնյա և հրեա թոքաթցիները, հարկերի բաշխման եղանակից դժգոհ լինելով, շարունակ վեճի մեջ են գտնվել: Ի վերջո ժողով գումարելով, ընդունել են հետևյալ որոշումը: Վիլայեթի ընդհանուր գումարից Թոզանլուի, Կումանատի և Կաֆիրների նահիյեները հանելուց հետո, բոլոր հարկերն ու վճարումները բաժանվելու են հինգ մասի: Հինգից երկու բաժինը վճարելու են մահմեդականները, իսկ երեքն էլ հույները, հայերը և հրեաները: Մահմեդականների մնացորդները գանձվելու է մահմեդականներից, իսկ մնացածն էլ մյուսներից: Այնպես որ մնացորդները մեկը մյուսի հետ չպետք է շփոթել»⁶⁷: Վավերագրերում նշված են ժողովին մասնակցած

⁶⁵ Mantran R., նշվ. աշխ., էջ 133:

⁶⁶ Старовольский С., *Двор цесаря турецкого*, СПб., 1883, с. 20.я

⁶⁷ Փափազյան Ավ., նշվ. աշխ., էջ 162:

երևելի անձանց անունները, որոնցից էին հավանաբար ազգությամբ հույն Իբենօղլու Պոկասը, Կիրասոնօղլին⁶⁸:

Բացի հարկերից, հույները, հայերն ու հրեաները պարտավոր էին ձրի աշխատել արքունիքի, տեղական կառավարական մարմինների համար: Կառավարությունը սկզբում ստիպում էր իրենից վարկ վերցրած արհեստավորին կամ առևտրականին ձրի աշխատել: Որոշ ժամանակ անց այդ աշխատանքը վերափոխվեց հարկի՝ *քասապ աքչեսի* անվամբ: Սակայն օսմանյան աստիճանավորները հաճախ ստիպում էին միաժամանակ և՛ աշխատանքը կատարել, և՛ հարկը վճարել: Դրանից տուժում էին հատկապես ձկնորսները, նավաշինարարները, արքունի վաճառականները, ոսկե թելեր արտադրողները և այլն: 1585 թ. Կոստանդնուպոլսի հույները պահանջում են իրենց ազատել հարկից, քանի որ արքունիքի համար ծառայություններ են կատարել⁶⁹: Սակայն՝ ապարդյուն:

Փաստորեն, Օսմանյան կայսրությունում հայերի ու հույների դերը աստիճանաբար նվազում էր: Ծանր պայմանների ու հարկերի, ծայրահեղ աղքատության պատճառով էլ շատ քրիստոնյա ընտանիքներ լքում էին կայսրության սահմանները, մի մասն էլ, իր և ընտանիքի ապահովությունը վտանգի տակ դնելով, շարունակում էր դիմակայել տիրող վարչակարգի կամայականություններին:

ГРЕЧЕСКАЯ ОБЩИНА КОНСТАНТИНОПОЛЯ В XV-XVII ВВ.

БРУТЯН М. А.

Резюме

В 1453 г. после завоевания турками Константинополя в жизни греческого народа произошли большие изменения. За короткое время город стал центром греческой диаспоры. В Османской империи благодаря грекам, а также соседствующим с ними армянам и евреям, оживились торговля и ремесленное дело. Мехмед II и последующие султаны поощряли их деятельность. Греки занимались виноделием, навигацией, рыболовством, конкурируя с армянами в сфере торговли и ремесел, что было на руку туркам, еще более разжигавшим их соперничество. Играв видную роль в экономической жизни Османской империи, греки наряду с армянами находились в бесправном положении.

⁶⁸ Լույն տեղում:

⁶⁹ Լույն տեղում, էջ 237: